

Obraćanje prvog zamjenika visokog predstavnika, Larry Butlera

Bosna i Hercegovina danas i izazovi koje nosi budućnost

Od momenta kada sam preuzeo dužnost prvog zamjenika visokog predstavnika, u martu 2005. godine, smatrao sam da je bitno da se svaki put obratim na ovakvom skupu, zbog toga što sam uvjeren da su ciljevi koje vi ovdje ostvarujete direktno povezani s onim što mi u OHR-u, i u okviru međunarodne zajednice u cjelini, pokušavamo ostvariti u saradnji s našim bh. partnerima.

Utvrđivanje nove i specifične uloge za oružane snage BiH je osnovni segment sveukupnog oporavka Bosne i Hercegovine.

Ovakva vrsta obuke, sa svojom multinacionalnom strukturom i orijentacijom ka vojnim izazovima u svijetu u kojem živimo nakon okončanja hladnog rata, ilustrira izazove s kojima se danas suočavaju i oružane snage u BiH.

U protekle tri do četiri godine oružane snage u BiH su provele neke od suštinskih promjena u pogledu brojnosti trupa, vojne doktrine, strateškog načina razmišljanja i obezbjeđenja opreme.

Cilj ovih sveobuhvatnih i ambiciozno zamišljenih aktivnosti bio je uspostavljanje vojne strukture koja zadovoljava potrebe BiH i u skladu je s resursima koje ova zemlja ima na raspolaganju.

Tokom ovog perioda u Bosni i Hercegovini je došlo i do značajnih promjena u pogledu njenih potreba i resursa.

To je, dakle, podrazumijevalo provođenje izuzetno komplikovanog procesa, a sofisticirani modeli obuke koji se primjenjuju u ovom Centru su njegov značajan dio.

Moderne vojne snage mogu efikasno funkcionirati jedino ukoliko su oficiri u potpunosti upoznati s modernim strateškim i rukovodećim tehnikama.

Dozvolite mi da se sada osvrnem na današnju temu: «BiH danas i izazovi koje nosi budućnost». Ovo je izuzetno prikladan trenutak da se govori o ovoj temi jer se opći izbori, koji će imati presudni značaj, održavaju za samo mjesec dana.

Vrlo je vjerovatno da će «danas» i «sutra», metaforički govoreći a možda čak i bukvalno, biti vrlo različiti.

Izbori će preoblikovati političku scenu i postaviti temelje na kojima će lideri ove zemlje morati raditi u sljedeće četiri godine.

Ukoliko ovi temelji budu postavljeni na konstruktivan način, Bosna i Hercegovina će imati veliku šansu da postigne istinski i značajan napredak i, što je najvažnije, da ostvari napredak ka dvostrukom cilju koji želi ostvariti svaki građanin Bosne i Hercegovine a to je članstvo u Evropskoj uniji i članstvo u NATO savezu.

Jasno je da će i same oružane snage dati svoj direktni dopinos u postizanju ovog drugog cilja. Uvođenje standarda u sferi rukovođenja, borbene gotovosti i sveukupnog profesionalizma u oružanim snagama, kako bi se osiguralo poštivanje zahtjeva NATO-a, je zadatak za svakog oficira BiH u ovoj prostoriji.

Prednosti članstva u programu «Partnerstvo za mir», i na koncu, članstva u NATO savezu su jasne. Svakako ih ne moram posebno naglašavati, posebno pred ovakvim auditorijem.

Međutim, smatram da niko od nas ne smije podcijeniti politički i psihološki značaj napretka ka članstvu u NATO-u.

Svaki korak naprijed na tom putu znači udaljšavanje od nesigurnosti koja se pokazala kao uporna i štetna posljedica sukoba s početka devedesetih, iako njen intenzitet vremenom slabi.

Nesigurnost se pokazala kao velika prepreka u općem procesu oporavka. Predstave o rizicima u BiH, vrlo često predstave koje ni u kom slučaju nisu zasnovane na tačnim informacijama a vjerujem da se i moje kolege iz Svjetske banke slažu s ovom tvrdnjom, su spriječavale sticanje većeg povjerenja u bh. ekonomiju kao preduslov održivog razvoja.

Povoljna poslovna klima će omogućiti da Bosna i Hercegovina privuče prijeko potrebna ulaganja za otvaranje desetina hiljada novih radnih mjesta. Dakle, moguće je kreirati dobru poslovnu klimu samo ukoliko je osnovno pitanje vojne sigurnosti razriješeno na zadovoljavajući način.

Reforma oružanih snaga u BiH, koja se odvijala tokom protekle tri ili četiri godine, efikasno razriješava ova pitanja.

Dakle, svako od vas ima ključnu ulogu u poslijeratnom oporavku Bosne i Hercegovine, i to ne samo u vojnoj sferi.

Mislim da je realno istaći da novi i viši standardi obuke direktno doprinose otvaranju novih radnih mjesta i da su dio istog međusobno povezanog procesa.

Kao što sam rekao prilikom moje posjete prošle godine, modernizacija vojnih snaga ne znači još jedan zadatak koji se jednostavno može prekrižiti kao ispunjen na listi stvari koje je potrebno učiniti, odnosno u nizu reformi koje Bosnu i Hercegovinu vraćaju u evropske tokove.

Oružane snage imaju specifičan značaj i temeljnu ulogu za građane. Oružane snage predstavljaju ovu zemlju na vrlo konkretan način.

Vaš uspjeh smatraće se uspjehom Bosne i Hercegovine. Stoga je

izuzetno važno da budete uspješni.

Mislim da ne moram posebno napominjati da je taj uspjeh takođe ima izuzetan i lični značaj za svakog od vas.